

四庫全書

史部

欽定四庫全書

續資治通鑑長編卷二百九十七

宋 李燾 撰

神宗

元豐二年三月庚午朔董戢經沁伊達木凌節等來貢
方物上問所以來之意對曰董戢蒙恩許貢故遣使謝
上慰撫之皆歡呼舞拜 權監察御史裏行舒亶為集
賢校理以上批亶優於辭學詳於吏治自丞屬憲府能

劾官吏以聞知諫院李定言京東河北飢青齊滄棣尤甚陛下已勅有司賑救貧乏租稅欠負例皆展闕減價出粟支借種錢籍錄飢羸給以日食尚聞民不安居漸有流散乞戒監司檢察州縣若賑救不如法致有逃死以戶口多少等第黜罰知諫院黃履亦言知青州龔鼎臣知滄州張問性雖厚重而短於應務不足以賑乏紓急乞別選能者易鼎臣問以他郡皆不行

朱本削此三事

詔

兩浙路災傷民負戶絕田產價錢者展限半年輸官初

以先後左右朝廷政事為己職責故也 詔錢藻且權

開封府以許將連太學獄事而御史臺鞫治多用開封

府吏也

八月丙辰
許將責

權御史中丞蔡確言畿內及諸路

闕雨宿種未長重虞疾疫陛下賑卹窮乏詔書數下仁

民之慮可謂至矣臣愚竊謂四方犴獄宜更澄察決滯

理寃足召協氣乞詔畿內提舉司諸路轉運或提舉司

委官與提點諸縣鎮及提點刑獄官巡按闕雨州縣督

治未結絕公事有涉枉濫或無故淹延者並申理決遣

本路乞展限一年而司農寺以為太寬也 賜辰州捕
搖賊兵丁特支錢

辛未詔河東定奪吉伯溝地界毋得張皇或致生事候
究治得實具奏聽旨以管勾緣邊安撫司王崇拯言差
官定奪滋長狡計宜但戒地分巡檢毋得侵越耕種而
已上以其言為然故有是詔 又詔開封府界僧寺旅
寄棺柩貧不能葬歲久暴露其令逐縣度官不毛地三
五頃聽人安葬無主者官為瘞之民願得錢者官出錢

貸之每喪母過二千勿收息詔提舉常平等事陳向主其事以向建言故也後向言在京四禪院均定地分葬遺骸天禧中有敕書給左藏庫錢後因臣僚奏請裁減事遂不行今乞以戶絕動用錢給瘞埋之費至六月向又乞選募僧守護量立恩例並從之葬及三千人以上度僧一人三年與紫衣有紫衣與師號更令管勾三年願再住者準此向桐廬人也

張舜民云云可考新舊紀並書詔幾內貧民不能葬

者給地貸以錢無主者瘞之

癸酉賜梓州路轉運司度僧牒百修遂戎瀘州城

丁丑上批前內侍省高班梁堅坐監嵩慶陵自盜贓貸
死編管襄州該恩已放逐便今貧窶無所歸內臣執事
兩省更無他所安排可與一內侍省把門內品遂為後
苑散內品 環慶路經畧使俞充言蕃部昌寧為西界
守領使詐歸投來刺邊事續來理索并熟戶蕃部蘇尼
亦入漢界刺事若依法處置昌寧恐生彼疑乞牒還西
界蘇尼乞刺配近裏州軍上批蘇尼有死罪二一犯十

惡法當緣坐今幸敗獲所宜明正典刑不知有何情理
可矜特為末減昌寧雖本西人自是入中國刺事理亦
不可牒還縱今遣回未知於夏人疑我之心如何可解
顯亦全無意謂可令依法施行其捕獲蕃官速依條酬
獎節畧蘇尼等情款牒廊延路令轉牒宥州取問首領
擅遣人入中國刺事人罪嚴加誡斷遂斬蘇尼而昌寧
處死 上批大理寺長貳丞主簿家屬既不在治所如
遇休假宜止各輪一員在寺餘歸休沐庶制可經久人

無憚倦其著為令 三司言會計河北東路熙寧十年

收支實關錢帛等比轉運副使陳知儉判官汪輔之元
奏之數少七十三萬餘緡知儉等誠不職乞降黜以誠
諸路詔提舉司劾罪奏之輔之坐杖七十知儉杖六十
各該去官詔各特罰銅二十斤 知都水監丞范子淵
言修黃河南岸治水隄乞給人兵物料緡錢詔發卒三
千人給官莊司熟藥所錢共三萬緡仍特賜公用錢二
百緡 提舉河北糴便糧草王子淵言糴緣邊軍儲皆

商人入中歲小不登必邀厚價故設內地州縣寄糴之法以權重輕自內地用御河船運至緣邊且以熙寧八年言之網船三百用兵工幾二千人所運不及八萬石計網船兵工約一斗已費錢七十矣若僦私船百里之地斗才一錢三分至五分率以千里之遠計之猶可省網船所費之半宜雇客船便下三司議三司請留網船二百二十艘應副船運不足即如子淵議從之今歲終具和雇私船所省錢數以聞

戊寅錄北界人程詮程岳為三班借職程景三班差使
李弼送襄州賜地二頃月支錢千米一石三年詮等嘗
為邊人刺北事及嘗告獲姦細事覺來歸定州安撫使
乞推恩故也

庚辰御集英殿策禮部進士

舊紀具載策題

禮賓使嘉州刺

史高公繪為羣牧都監文思副使高遵路管勾景靈宮
公繪以皇太后從子遵路以從叔也

辛巳詔今歲特奏名明法改應新科明法人試大義三

道 又詔京朝官選人班行所試經書律令大義斷案
上等三人循一資中等三十四人不依名次注官下等
七十人注官

壬午策特奏名進士又策武舉進士 刑部言祕書省
正字王鞏坐嘗借趙居兵書當杖八十追兩官勒停已
叙祕書省正字今又及三朞當叙太常寺太祝上批王
鞏所犯交結巨惡情理極重緣當日元勘不盡故案法
得罪至輕可更展三朞與叙元官 詔發壯役兵二千

京東廂軍一千濱棣州修城據中崇勝兵五指揮並赴
洛口工役

癸未御集英殿試諸科新科明法 龍圖閣直學士知
渭州蔡延慶權知開封府延慶初得安南九軍法讀之
謂諸將曰漢蕃兵馬未整幸今無事可依此團結以備
調發乃以正兵弓箭手人馬團為九將合百隊分四部
為左右前後而隊有駐戰拓騎之別步騎器械每將皆
同又以蕃兵人馬為引隊各隨所近分隸諸將每將之

數不及正兵之半所以制之也處老弱於城砦使漢蕃
不相雜所以防其變也為書上之會邸延路亦分畫兵
將朝廷以兩路所奏遣徐禧議定禧奏宜依邸延奏未
事乃下諸路有不同者具析以聞延慶條邸延所奏未
便者具上且言不敢附下以孤委任上是延慶以禧為
不然乃召延慶神宗初以延慶分畫兵將為是後乃有
詔褒獎徐禧且命禧代延慶則似禧為
是也延慶傳云上以禧為不然當考褒獎禧詔在此
月丙戌御集四月十八日元年七月辛卯更詳之

龍圖閣待制知秦州呂大防知審刑院御史舒亶言大

防果於立異足動流俗使在朝廷於聖政有損無益乞
與一在外差遣不聽 詔聞廊延路緣邊蕃部有積年
借貸錢穀主事催督迫急貧下戶難於送納甚有自盡
及亡出外界者可更展限半年環慶路準此 賜董戩
進奉馬四百六十三匹價錢一萬一千二百緡銀綵各
千對衣金帶銀器衣着等補進奉大首領經沁伊達木凌
節珍州刺史劉勇丹濟古扶州刺史餘有官者遷一資
未命者補職名有差歲增大首領大綵十七匹小首領

五匹散茶各十斤以經制熙河邊防財用李憲言經沁伊達木凌節叙述和斷之勞故也

回賜馬價用密院時政記增入密記却不書銀

絲當考

閤門言同天節臣僚罷散道場賜御筵乞依燕

式賜花從之太常博士周直孺等言國信一路郡縣驛亭陳設什物以致樂器等故弊乞新之詔自京令國信所緣路委監司一員先事點檢完治秦鳳路經畧使呂大防言階州漢蕃戶獻納并根括田五百二十頃頃可募弓箭手詔依緣邊法人給地兩頃

丙戌龍圖閣直學士知成都劉庠進一官知秦州 太

子中允集賢校理知諫院徐禧為右正言直龍圖閣權

發遣渭州賜緋章服其計議措置邊防事如故

計議措置如故

據禧本傳初陝西緣邊兵馬蕃弓箭手與漢兵各自為軍每

戰多以蕃部為前鋒而漢兵守城伺便利後出不分戰

守每一路以數將通領之呂惠卿帥鄜延以為調發不

能速集始變舊法雜漢蕃兵團結分守戰每五千人隨

屯置將具條約以上邊人及議者多言其不便上頗采

惠卿議欲推其法於諸路故遣禧往計議禧先具環慶
法上之遣官措置涇原而涇原帥蔡延慶以為不可朝
廷亦是之并難禧環慶法禧歷疏涇原法疎畧參錯圖
其狀別為法以奏且言環慶法不可改上與惠卿詔曰
徐禧論措置析將事惻怛慷慨謀國不顧已令代延慶
帥涇原卿宜勉終之異日為一代良臣矣
元年六月丙寅初遣禧計
議七月辛卯有詔付禧及諸路是
年三月癸未蔡延慶云云可考
太原府路走馬承
受全惟幾言馬遞鋪兵轉送朝廷邊機遞角檐擎使命

行李并諸搬綱運軍器材料衣賜絹布之類畧無休息
雇賃脚乘倍費錢數窮困凍餒乞加寬卹上批久聞銷
兵艱勤之狀深可傷惻今因惟幾到闕面審其實具道
逐人衣不庇體食不充口家人則以不任寒凍多埋覆
於溫灰之中以苟活生命窮極如此亟宜拯卹可委陳
安石速具措置以聞後安石言欲乞應軍器及材料并
衣賜凡綱運並差廂軍搬運日支口食如闕卽和雇又
軍器材料其間有不適用及羸重枉破脚乘欲乞並委

所屬專差官相驗堪好方得起發應合變造成樸並令
要用去處先造樣一二件關送起發州軍依樣計置應
副如此減得脚乘兼便於津搬詔軍器監相度以聞本
監言如此誠便並從之 河北緣邊安撫司言雄州兩
輸戶避北界差夫及科桩木修涿州城各攜家屬來近
本州并關城居止上批兩輸戶避役迁移不免失所其
給口食賑卹候北界科役少息諭令復業

戊子管勾廣南西路常平等事劉誼言邕州官舍民居

悉以茅覆蕪兵火之後邊城樓櫓未備乞集陶匠燒瓦
運宜州木板置溪峒竹蓋公私屋宇庶絕火患從之詔
誼經畫施行轉運司協力應副 上批河東路見運物
材就緣邊造軍器顯為迂費張皇可令軍器監速罷之
廣西經畧司言延衆鎮右千牛衛將軍張智常誘致
九道白衣富雅州李聚明等內附詔遷智常右監門衛
將軍

庚寅詔入內東頭供奉官宋用臣都大提舉導洛通汴

前差盧秉罷勿遣初去年五月西頭供奉官張從惠言
汴河口歲歲閉塞又修隄防勞費一歲通漕纔二百餘
日往時數有人建議引洛水入汴患黃河嚙廣武山須
鑿山嶺十五丈至十丈以通汴渠功大不可為自去年
七月黃河暴漲異於常年水落而河稍北去距廣武山
麓有七里遠者退灘高濶可鑿為渠引水入汴為萬世
之利知孟州河陰縣鄭佶亦以為言時范子淵知都水
監丞畫十利以獻歲省開塞汴口工費一也黃河不注

京城省防河勞費二也汴隄無衝決之虞三也舟無激射覆溺之憂四也人命無非橫損失五也四時通漕六也京洛與東南百貨交通七也歲免河水不應妨阻漕運八也江淮漕船免為舟卒鑿沉溺以盜取官物又可減汴流牽挽人夫九也沿汴巡河使臣兵卒薪槎皆可裁省十也又言汜水出王仙山索水出嵩渚山亦可引以入汴合三水積其廣深得二千一百三十六尺視今汴流尚贏九百七十四尺以河洛湍緩不同得其贏

餘可以相補懼不足則旁隄為塘滲取河水每百里置木牖一以限水勢隄兩旁溝湖陂澮皆可引以為助禁伊洛上源私取水者大約汴舟重載入水不過四尺今深五尺可濟漕運起鞏縣神尾山至士家隄築大隄四十七里以捍大河起沙谷至河陰縣十里店穿渠五十里引洛水屬於汴渠總計用工三百五十七萬有奇疏奏上重其事是年冬遣左諫議大夫直學士院安燾入內都知張茂則行視正月燾等還奏索水在汴口下

四十里不可引洛汜二水積其廣深纔得二百六十餘尺不足用滲水塘引鑿大河緩則填淤急則衝決洛水惟西京分引入城下流還歸洛河禁之無益置牕恐地勢高下不齊不能限節水勢黃河距廣武山有纔一二里者又方向着南岸退灘堅土不及二分沙居十之八若於其間鑿河築隄至夏洛水內溢大河外漲有腹背之患新隄一決新河勢必填淤則三百餘萬工皆為無用又子淵建此本欲省汴口歲歲勞費今置堤埽水達

之類歲計恐不啻一汴口之費而又有不可保之慮雖然財力在人猶可為之惟是水源不足則人力不可彊致蓋伊洛山河盛夏雖患有餘過此常若不足疑謀勿成惟陛下裁之上以子淵計畫有未善者乃命用成經度以楊珪往至是用臣還奏可為請自任村沙谷口至汴口開河五十里引伊洛水入汴每二十里置東水一以芻槌為之以節湍急之勢取水深一丈以通漕運引古索河為源注房家黃家孟王陂及三十六陂高仰處

儲水為塘以備洛水不足則決以入河又自汜水關北
開河五百步屬於黃河上下置牐啓閉以通黃汴二河
船筏即洛河舊口置水達通黃河以泄伊洛暴漲之水
古索河等暴漲即以魏樓滎澤孔固三斗門泄之計用
人九十萬七千有餘又乞責子淵修護黃河南隄埽以
防侵奪新河詔如用臣策故有是命始營清汴主議者
以為不假河水而足用後歲旱洛水不足遂於汜水斗
門以通水筏為名陰取河水以益之朝廷不知也

朱本
云其

後清汴成率如其說波流平緩兩隄平直汴行者道里
無倍官舟既無激射之虞江淮扁舟四時上下晝夜不
絕至今公私便之非上意明斷不惑於凡淺之論千載
之患未易除也此朱本所云新本已削去上用墨本也
新紀於四月二十六日甲子書起役導洛通
汴舊紀於六月十七日甲寅畢工乃書之

辛卯詔權發遣羣牧判官太子中允王欽臣罰銅十斤
坐違法擅移所部官也 賜登州度僧牒百修城 上

批西驛交市舊法除買於官庫外餘悉聽與牙儈市人
交易提舉市易司近奏並令市易上界管認一切禁其
私市聞戎人甚不樂昨正旦使所須物本務又不能盡

有不免責買於市肆今會其贏數亦不多宜令仍舊

御試編排官李承之等言熙寧九年御試新科明法正
奏名三十九號止以通粗資次編排今一百四十六號
比前數倍欲以二通為合格分兩等從之 命樞密院
編類文字大理評事蔡碩等編類將官敕令承旨司修
定以都承旨韓縝等言自降將敕後陳請不一慮衝改
不明諸將或未諭恐誤施行故也

壬辰詔近已差宋用臣都大提舉導洛通汴可令范子

淵修黃河南岸畢留卒二千給用臣工役仍令轉運副使李南公專應副河南府都巡檢一人往洛口編攔用臣支賜依所寄諸司使給之 知延州呂惠卿乞招敢勇每十人為一甲從之 河東路經畧司言麟州有西人先放箭及虜兵士呂重等欲牒宥州誠約詔人馬已索到箭數不多更不移牒 詔敗折場務買撲等錢保人當填納者委提舉司具拖欠年限歲豐凶及保人家力當給日限申司農寺詳度指揮從本寺請也

癸巳集英殿賜進士明經諸科開封時彥以下及第出

身同出身同學究出身總六百二人

舊錄鄧綰傳云綰知熙寧六年貢舉

請進士第五甲依舊賜本科出身無以同學究恥之不從後元豐二年再言之卒從其請新錄辨曰熙寧六年有請不從元豐二年賜進士及第出身同出身亦有同學究出身者卒從綰請忘也今削去舊紀書進士明經諸科賜第及授官者千三百八十人

新紀同蓋并癸巳日所賜人數也

客省言車駕遊

幸射弓故事每御箭射中宰臣親王以下進馬欲自今

初射中羣臣進馬及賜羣臣馬如舊續射中並免進奉

從之 詔審刑院刑部自今留滯公案及二百道官吏

勒宿

甲午御集英殿賜特奏名進士明經諸科同學究出身
試將作監主簿國子四門助教長史文學助教總七百

七十八人

新舊紀并
入癸巳

雄州言北界民戶以差配騷擾

併有驚移涿州乃移文言南界縣官以兵馬遮約不令
應役請速遣回詔雄州具創生侵越騷擾因依報之及
戒兩縣巡防候北界差科稍息即諭驚疑人戶歸業既
而緣邊安撫司言逃移人多客戶自言若北界未肯罷

夫欲往他處營田作力以為歲計樞密院請詔雄州曉諭民戶田蠶及時不可遠棄家產候北界差科稍息有人招呼各歸復業上批兩輸戶逃移四方雄州深以為不便者不過恐元佃之地全為北人拘占今逃者既多客戶則浮寓之民縱使散之他所亦無深害可止令出榜安慰還業

新舊紀並書詔雄州兩輸戶南徙者諭令復業

丙申閭門通事舍人河北緣邊安撫副使劉瑄乞兩輸人已於近南居者不得復於兩輸地來往詔雄州已發

遣歸業民戶責隣保覺察

丁酉詔新進士依舊式賜錢五百千為宴集費外特賜千緡諸科三百千 詔大理寺月具見禁及已決罪人數申中書 賜特奏名進士孫寶養真處士以寶犯不考式恩補攝助教不就自言有修鍊術乞一名號歸山故也

孫寶何許人

邢州乞權住散本州市易司緡錢以寬民力詔都提舉市易司案民戶逋負數多州縣毋得給錢 降東上閤門使果州刺史秦鳳路副總管夏元幾

為都鈐轄坐前知鎮戎軍失入死罪也

五月己巳又責

岐王

顥之夫人馮侍中拯之曾孫也失愛於王屏居後閣者數年是春岐王宮遺火尋撲滅夫人聞有火遣二婢往視之王見之詰其所以來二婢曰夫人令視大王耳王乳母素憎夫人與二嬖人共譖之曰火殆夫人所為也王怒命內知客鞠其事二婢不勝拷掠自誣云夫人使之縱火王杖二婢且泣訴於太后曰新婦所為如是臣不可與同處太后怒謂上必斬之上素知其不睦必為

左右所陷徐對曰彼公卿家子豈可遽爾俟按驗得實
然後議之乃召二婢命中使與侍講鄭穆同鞠於皇城
司數日獄具無實又命翊善馮浩錄問上乃以具獄白
太后因召夫人入禁中夫人大懼欲自殺上遣中使慰
諭曰汝無罪勿恐且命徑詣太皇太后宮太皇太后慰
存之太后與上繼至詰以火事夫人泣拜謝罪曰乃縱
火則無之然妾小家女福薄誠不足以當岐王伉儷幸
赦其死乞削髮出外為尼太后曰聞詛詈岐王有諸對

曰妾乘忿或有之上乃罪乳母及二嬖人命使送夫人於瑤華宮不披戴舊俸月錢五十緡更增倍之厚加資給曰俟王意解當復迎之

此據記聞附于月末

復置熙州狄

道縣

舊紀仍不書此

夏四月庚子內藏庫使張若訥代种諤知岷州禮賓副使康識代楊萬知通遠軍以上批諤萬與經制邊防財利司數論辦公事因而生隙勢難安處故易之以諤知涇州 陝西都轉運使度支郎中皮公弼降一官展磨

勘二年公弼常舉汝州俞士龍坐自盜賊法寺當公弼
徒二年勒停詔以公弼經制鹽事有勞免勒停

辛丑幸金明池觀水嬉燕射瓊林苑上射中的羣臣皆
賀迺命羣臣射又特命樞密副都承旨張誠一射酒罷

御苑門觀軍士射柳枝上自即位至是始再幸池苑後

不復至矣

新舊紀並
書幸池苑

癸卯太皇太后皇太后幸金明池上扶太皇太后登輦
又豫為百寶酒船於是馳以上壽 權發遣鹽鐵判官

提舉成都府等路茶場國子博士李稷言自熙寧十年
冬推行茶法至元豐元年秋凡一年通計課利及舊界
息稅并已支見在錢七十六萬七千六十六緡上批蜀
茶變法又前後奉行使者失指議論紛紜恐動羣聽稷
能推原法意日就事功宜速遷擢以勸在位遂落權發
遣詔編茶場一司敕

甲辰遼主遣林牙懷化軍節度使蕭晟左諫議大夫知
制誥張棄來賀同天節龍圖閣直學士右諫議大夫

宋敏求卒

乙巳提舉成都府等路茶場李稷言經制司擅權買熙
河岷州通遠軍商人貨詔經制司具析以聞後李憲言
自置司以來除蕃商水銀及鹽川寨鹽官鎮兩場依法
禁私販外市易賣買並取情願交易未嘗拘攔臣以淺
疎終恐難逃吏議乞獨坐臣罪乃詔憲赴闕令轉運使
蔣之奇根治劾有罪之人又詔之奇宜依朝廷所降事
目推治虛實無令支蔓

詔之奇事在
七月辛未

及獄成憲與馬甲

趙濟霍翔坐奏事不實徒二年詔憲等所坐緣公宜依

德音釋之

獄成據朱本在六月戊戌朔今并入此御集在十一月二十六日是年九月十八日十月

十五日皆有德音九月十八日止及潁州當是十月十五日朱本必誤當從御集

詔昨安南

從軍士卒因病寄留後不知存亡者除籍給贖從廣西經畧司請也

庚戌詔新賜進士及第自第四甲以上依熙寧九年推恩諸科正及第明經出身依熙寧六年推恩命御史中丞蔡確同判流內銓官注擬又詔司農寺出坊場錢

十萬緡賜導洛通汴司增給吏兵食錢內以二萬緡給
范子淵為固護黃河南岸薪芻之費 上批聞充鄆徐
濟等州久無雨穀麥失望人情不安雖已遣內臣往東
嶽建道場可更遣禮官祈禱 又批廣西春旱特甚其
令安撫轉運司訪名山靈祠祈禱 又詔河北東路提
舉常平倉司所散瀆棣滄州飢民食至五月止 封濮
安懿王第十一女梁鑄妻仁壽縣主為同安郡主第十
八女夏大醇妻崇德縣主為永嘉郡主不俟大禮給俸

舊制再經大禮方給故也 命江南西路轉運判官彭

汝礪提舉兩浙路常平等范岫就潤州推鞠呂嘉問事

詔嘉問權罷潤州

嘉問以前知江寧責臨江軍事在明年正月壬午江東監司奏乞罷嘉問

潤州事在去年十二月癸卯

環慶路都鈐轄皇城使帶御器械梁

從吉領昌州刺史從吉在環慶歷四任故特遷之

辛亥以新科明法及第王士為試銜知縣律學教授

壬子遼使辭置酒紫宸殿不作樂以乙卯有司薦饗太

廟是日齋故也

乙卯廣南西路經畧司言賓州瘴癘加以兵火之後難得官願就乞差殿中丞吳潛知賓州從之 司勲員外

郎韓晉卿知壽州晉卿自大理出知同州上批晉卿非次替罷可特與一見闕故從之 詔導洛通汴用是月

甲子興工遣禮官祭告如河道侵冢墓量給錢令遷避無主者官為瘞之 賜固護黃河南岸卒特支錢

丙辰廣南西路經畧司言順安州貢峒等舊隸邕州昨宣撫司因收復廣源分隸順州乞還舊隸從之

丁巳鎮江節度使同平章事秀國公陳升之致仕直學士院安燾草辭有云尹躬一德共嘉同體之和說命三篇獨先注意之任卒有成績基於始謀御史舒亶指此六句以為悖禮失實詔燾改之乃盡去六句止云早從士論擢典冢司貼麻行下後二日升之卒贈太保中書令輟視朝二日成服於苑中謚成肅升之深狡多數善傳會以取富貴丹陽居第壯大踰制南方人驚詫以為未識其它豪侈類此

舊紀並書致仕紀但書卒

上批聞知鄜州尹

寶臣有子三班奉職抃妙知為弓能辦六材令乘驛赴
闕 詔西上閤門使嘉州團練使知保州張利一及三
年與代定州路都鈐轄再任從安撫使韓絳奏也

已未廣南西路經略司言蠻寇順州乞濟師上批可發
潭州團結兵全將往桂州權戍庶可以鎮安二廣人心
不致怯懼候邊事息追還 知諫院李定言秀州嘉興

崇德兩縣初定役法時以僧舍什物估直數錢恐非法
意下司農寺請下本路改正他路有類此者令提舉司

依此施行從之

庚申上批河北東路提舉官李孝純乞拘收諸路官司
先借兌出本司錢穀可選差精敏有風力文臣一員兼
委以拘催都水監借京東等路提舉司雇夫錢廼遣都
官員外郎潘良器催促發還 以龍衛廢營地賜衛國

公主地與主第相直也主後以其地建法雲寺 京西

第五將言昨奉詔遣教頭二人教習馬軍各已精熟詔
京西第五將提點刑獄司那官一員依案閱將兵馬軍

格案試具合格人以聞既而上批勾當軍頭司內侍押班石得一往南路管勾墓事可因便委令閱視庶諳知次第不為將副所紿朝廷誅賞所加發必無妄遂改用得一

辛酉鹽鐵判官提舉成都府等路茶場國子博士李稷權陝西轉運使兼制置解鹽使都大提舉茶場稷在長安州軍縣鎮創增侵街錢一路騷然與李察皆苛暴時人為之語曰寧逢黑殺莫逢稷察 賜故陝西都轉運

使屯田郎中直昭文館皮光弼家絹三百匹後復錄其
子彥仲為將作監主簿壻試將作監主簿不理選限趙
仲邈許出官以轉運使范子奇等言公弼因出巡致疾
乞優卹其家故也錄子壻在七月二十日丁亥今并書
言得歸明人戶三千三百七十五

壬戌詔大理寺劾陳世儒留繫多日繼又推治初勘官
不公及因緣請求遷延久未結正可遣御史黃顏監勘
乙丑日
可并
提舉成都府等路茶場司請自今歲課茶息

稅錢已定十五萬緡歲以五萬緡給轉運司餘以待詔用從之

癸亥詳定正旦御殿儀注所言元會受朝賀執鎮圭非是伏請不執上壽準此又言元會行禮於朝而天子服祭服羣臣服朝服亦非是請服通天冠絳紗袍又言御殿當設旗幟仍闕大慶殿門皇帝即御座禮官等引中書門下親王使相押諸司三品尚書省四品及宗室將軍以上班分東西入正安之樂作至位樂止羣臣不服

劔不脫屨烏並從之

此但舉其要而削其繁辭

提舉成都府等路

茶場司乞留銅錢百萬緡為本從之

甲子知審刑院安燾言天下奏案視十年前增倍以上

審刑院刑部詳議詳斷官視舊員數頗減乞復置詳議官一員又詳議官遍簽刑部斷案職事不專乞分議官六員每案二員連簽若情狀可疑未麗於法即議官通簽如此則疑難之獄得盡衆議明白罪案不致留積詔增審刑院詳議詳斷官各一員罷刑部檢法官一員餘

如燾請 詔權判南京國子監駕部郎中鄭宗礪罰銅

十斤致仕坐前知眉州失入人死罪會赦而宗礪年七

十餘故也

新紀於二十六日甲子日書導洛通汴蓋起役之日也六月十七日甲寅畢工三月二十

一日庚寅可考

乙丑詔知大理少卿蹇周輔丞葉武賈種民同黃顏鞠

陳世儒事從顏請也手詔大理寺勘陳世儒惡逆事雖

續根究世儒妻母因緣請求致軍巡元勘官改易情節

變移首從故出入本罪世儒夫婦無緊切照證自可結

正以聞

可并壬戌及五月庚辰
明年正月庚寅武罷丞

丙寅鹽鐵副使工部郎中李復圭為集賢殿修撰知滄

州候二年與諫議大夫尋改知鄧州

改鄧州御集在六月九日當考其故

或並
削去

提舉成都府茶場李稷言洋州西鄉縣茶舊與

熙河秦鳳路蕃漢為市而商人私販南入巴達州東北

入金州永興軍鳳翔府官未置場以前於州界仙遊少

府雞雄歸仁洋口等鎮舖差牙校編攔抄發指州縣輸

稅熙寧十年廢罷四場牙校止留洋口一處州縣慢令

私販公行西鄉茶歲比舊減少乞雞雄等場令州縣督
責買撲人編攤歸仁鋪乞依舊輪差稅務牙校編閱抄
發園戶中官茶數歲以三十萬斤為額增及萬斤賞錢
一千如虧少量事決罰從之 司天監太卜令魏成象
請宗室祔葬三品以上用輜車如禮文四品以下用輜
輶車如舊例可減雇夫錢布禮院請如成象議從之

日事今
附月末

欽定四庫全書

史部

續資治通鑑長編卷二百九十八

詳校官檢討

臣

劉錫五

刑部郎中

臣

許兆椿覆勘

纂修官修撰

臣

黃軒

膳錄舉人

臣

黃道熒

欽定四庫全書

續資治通鑑長編卷二百九十八

宋 李燾 撰

神宗

元豐二年五月戊辰朔右神武軍大將軍衢州團練使
秦國公克瑜為隰州團練使太宗正言克瑜歲滿當遷
遙郡上批克瑜繼秦王後襲公爵故特遷正任後以右
武衛大將軍潮州刺史楚國公世恩為袁州刺史右武

衛大將軍封州刺史魏國公仲來為筠州刺史右武衛
大將軍濱州防禦使陳國公仲郃為棣州團練使用克
瑜例也 上批太學外舍生檀宗益上書論修整學事
頗有條理疑其應務之材在所可試判國子監李定嘗
保奏自入學無殿罰同齋諸生稱其素行無關可試校
書郎充太學錄所言太學事令李定同檢正中書戶房
公事畢仲衍看詳後又命同判監張瑬同看詳立法以
聞

後命在戊子今
并書究竟當考

太常博士館閣校勘王伯虎罷檢

詳樞密院吏房文字上批大理寺方劾伯虎貸錢事覺
乃還及賣買貪污雖未知抵罪重輕然據見事其所為
凡下瑣屑已不可為樞府掾屬故罷之 詔權發遣江

南西路提點刑獄李革衝替展磨勘二年知建康軍蔡
若水等罰銅差替並坐廖恩發所部初不覺察故也

資政殿學士右諫議大夫蔡挺卒贈工部尚書謚敏肅
己巳前權發遣環慶路經畧使岷州團練使高遵裕追
兩官知淮陽軍慶州通判屯田郎中吳仲舉衝替柔遠

寨主供備庫副使孫貴兵馬監押左侍禁王顧並追一
官免勒停都巡檢內殿承制輔佐罰銅二十斤差替西
頭供奉官閤門祇候桑遠寨巡檢胡永德追兩官免勒
停環慶路走馬承受入內東頭供奉官王懷正罰銅七
斤降京西監當前知大順城內殿承制康大同等四人
差替蕃官軍使羅遇杖脊刺配廣南東路牢城所焚西
界棚屋約價給還先是遵裕數使蕃部且烏及顧入西
界見蕃族梁額葉偵事且誘額葉來降後且烏為西人

所執永德等擅發兵出塞追取縱火焚新和市遵裕隱庇不治西人以為言隣路奏之手詔遵裕速根治為首

者痛繩以法遵裕亦不奉行

手詔當是熙寧十年八月五日

上遣樞密

院檢詳官范育就案還具奏其狀因命育推鞠獄成永德遇抵罪遵裕坐不奉詔及所奏漏略懷正亦以體量不實黜餘皆從坐也

元豐元年閏正月丁酉有縱火事

詔秦鳳路副

總管夏元幾罷任坐前知鎮戎軍買水銀令指使販易

及毀公使文記也

三月丁酉已責

祠部員外郎集賢校理趙

彥若兼修百官公卿表初命司馬光宋敏求同修敏求
卒光請以彥若繼成之詳定正旦御殿儀注所言正旦
御殿合用黃麾仗案唐開元禮冬至朝會及皇太子受
冊加元服冊命諸王大臣朝燕蕃國皆用黃麾仗本朝
故事凡皇帝受羣臣上尊號諸衛各帥其屬勒所部屯
門殿庭列仗衛令獨修正旦儀注而餘皆未及欲乞冬
會等儀注悉加詳定從之 定州路安撫司言奉詔候
有機便修加保州關城今涿州發兵夫修城欲乘此於

來春築保州城從之仍命止作幫貼不得過為張皇

如京使權廊延路都監高永亨先次衝替以本路經畧

使呂惠卿奏已劾治永亨役使蕃兵不平及職事弛慢

也

此據密院時政記永亨與惠卿異議具惠卿家傳當刪取增入家傳云公既至延考昔之措置參差抵牾

誠如上指蓋廊延之兵分屯緣邊與下番白地凡州軍城寨三十有五處而四將皆治延每將之兵所在交有且無隸城守者一日有警遣將東出則西兵從西出東亦然無寨之卒牽於顧家守城之官解以空壁下番之遠又不時至而欲其集力赴敵於百里之外故嘗以不及事為患公於是度城廣狹以步受兵如古法不足則籍餘夫益之守兵既足乃出其選以備作戰隨地置將其六據邊境之要其一治延其二在下番二州將有分

地兵有常將以蕃為鋒漢為脊欽將兵職戰城兵職守較然皆有統紀器械糧芻物計取具籍名數定條約又以守兵拓邊而盡合諸將於廷大閱之異時調發旬月不能集者一日可辦乃具上之會夏人以兵壁對境詔許以新法從事而樞密院有不說公者持難久之邊將高永亨自以姦賊不利公為之帥長乃騰說以為蕃兵不可參隸參隸虞變將兵不可以分置分置弱威閱士卒籍牛馬實召戎寇而上獨是公所建繼遣中官容士寄賜公詔曰省所上戰守事議論明白利害詳盡非卿智能曷若朕志已畫可付外矣惟底行之使言可績乃所望也於是著以為令三年六月十五日永亨訴寃

庚午詔輔臣觀麥於後苑

辛未權發遣戶部副使韓忠彥改鹽鐵副使權發遣鹽

鐵副使王居卿改戶部副使以上批鹽鐵事繁居卿兼
職別司恐難專辦仍事與市易相干妨礙故也 都大
提舉制置淮南運河司上濬運河官吏兵匠功狀詔董
役官吏堂除或指射差遣減磨勘年兵匠賜絹提舉官
賜銀絹有差

癸酉羣臣奏事垂拱殿御衣有蟲自襟沿至御巾上既
拂之至地視之乃行蟲其蟲善入人耳上亟曰此飛蟲
也蓋慮治及執事者而掩之實非飛蟲也

墨本附此於
卷末今從朱

本移
入此

翰林學士孫洙言御史東西獄迫近社稷乞徙
獄它所下禮院定禮院移問御史臺言獄雖與社稷相
近自有重垣限隔不惟無地可徙考之典禮亦自無嫌
書曰弗用命戮于社說者曰社主殺則是社之前猶可
以行誅戮豈於重垣之外不得繫訊罪人周制王宮右社
稷左宗廟其前庫門為外朝有嘉石肺石三槐九棘司
寇於此斷獄蔽訟今置獄在社稷垣外不為失洙議遂
寢詔知潤州司封員外郎直昭文館呂嘉問落職銜

替免勒停監市易務門河南府左軍巡判官華申甫除
名兩浙路提點刑獄祠部員外郎集賢校理王陟臣落
職銜替供備庫副使張濟追一官遠小處監當知慶州
天章閣待制俞充罰銅三十斤檢正中書孔目房曾伉
二十斤度支副使張璟十斤初江東轉運判官何琬劾
奏嘉問不法章未下而嘉問辨訴詔御史臺推治申甫
自京師以私書報之申甫得之於濟及陟臣充陟臣檢
正中書吏房充都舉市易司濟故三司吏伉嘗為璟道

嘉問事而璟漏其語於所親也上欲究所從來命取進
奏院發書歷得嘗與嘉問通書主名乃下開封府令人
自陳不盡當除名而申甫不以實故除名嘉問坐報上
不以實雖會恩不貸也

元年九月二十
六日詰嘉問

乙亥以右武衛大將軍仲忽領文州刺史仲忽陳國公
宗治長子上以宗治卒日諸子不與推恩特命之

丙子廣南西路經畧司言順州蠻叛內殿崇班知吉弄
峒零崇聚討平之及知歸化州文思副使儂智會率丁

壯千二百餘人應援乞推賞詔擢崇縣為供備庫副使

智會為宮苑副使

兩紀並書順州蠻叛峒兵討平之

戊寅詔成都府等路茶場司勾當公事官六人並遷一官以歲課增羨也

己卯復戶部侍郎知鄂州王韶為觀文殿學士知洪州

熙寧十年十月責

內藏庫言陝西路轉運司借紬絹十萬匹

未償詔李稷計直償以銀提舉成都府路茶場司上

茶法勅式詔行之仍歲增茶場司公使錢二百千廣

西經畧司奏根括團結到邕欽州峒丁成一百七十五
指揮內先籍定武藝上等一萬三千六百七人知邕州
劉初又乞於邕州左右江增置將官二員令左右江提
舉官就充副將及選兩江知州峒班行輪十人或八人
充隊將或指使逐指揮官給旗號鑼鼓其器甲標排之
類依溪峒例私各置辦官置籍拘收詔備錄前後所降
朝旨及趙高劉初論列更制什伍訓練部勒等利害并
凡諸臣獻議應干措置峒丁事並降付曾布令參酌便

宜撮取衆善如尚有關漏即創為規畫務要詳盡便於施行疾速條例聞奏其後布言欲乞令逐鎮寨監押寨主同管轄兵甲使臣並與巡檢等分定州峒等專一管勾立賞罰條約以為懲勸增置都巡檢使兩員分地分提舉及增首領丁壯每歲按閱及大教犒設例物其武藝絕倫之人保明聞奏量材補授名目及分擘使臣管勾地分詔添置都巡檢使二員餘送熊本擇可行者一

面施行

曾布熙寧十年二月知廣州元豐元年八月知桂州三年閏九月知泰州熊本自元年正月降

官分司西京三年閏九月提舉太平宮四年知滁州九月二日復集賢殿修撰知廣州此時尚分司西京朱本追記四年事今因之本志與實錄同但稍加刪削

庚辰手詔中書曰濮安懿王先帝斟酌典禮即園立廟詔王子孫歲時奉祀義叶思稱後世無得議焉今三夫人名位或未正瑩域或異處有司置而不講曷足以彰先帝甚盛之德仰承在天之志乎三夫人可並稱曰王夫人命主司擇歲月遷祔濮園俾其子孫以時奉主與王合食而致孝思焉初濮國公宗暉言父贈濮王而母

襄國太夫人韓氏墳猶用堊飾乞下有司議增修兼乞
專隸濮王園廟歲時奉祀上批依所奏未下而有是詔

新舊紀並
書此詔

封允寧女吳承裔妻安康郡君為安福縣

主允迪女曹識妻仁壽安福郡君為壽光縣主仍不俟
大禮給俸 詔司勳郎中李立之太常博士路昌衡重

鞠陳世儒獄以世儒妻李錄問稱寃也

四月壬戌乙丑當并考

詔右贊善大夫同提舉成都府等路茶場范純粹序官
廩給人從視提舉常平官薦舉官分李稷之半別給都

大提舉茶場印付稷聽稷純粹同轉運司舉官知洋州
並從稷請也 御史黃顏言陛下嘗詔兩制臺諫監司
各薦所知令中書籍記以待選用于今數年執政大臣
漫不省錄臨事索才失於倉卒有以致士大夫之私議
伏望陛下省覽所舉之籍隨所稱而試之不如舉者則
坐保任之人

辛巳崇文院校書邢恕為館閣校勘 太子少師致仕
趙槩上所集諫林其言曰臣年八十有二行將就木無

所干求以申臣素志爾上批可降詔獎諭庶以勸為學
老而無斃者 詔提舉教習馬軍官二員日往諸營按

閱事藝民在京坐局官司勤勞特異可月給茶湯錢二

十千破當直兵士十五人內王中正可就差親從官狄

詔於馬軍上軍旗頭內差

此據御集一百十七卷元豐二年五月十四日手札增入

熙寧七年九月十九日甲寅十年九月二十三日庚午
元豐二年五月十四日辛巳十一月二十九日癸巳十
二月二十七日辛酉三年三月十一日甲戌五月十一
日癸酉六月十八日巳酉十一月三日辛卯五年十一
月十七日甲寅六
年二月五日辛亥

癸未命檢正中書戶房公事畢仲衍同三司講究麴法

利害以聞

八月十三日

甲申工部侍郎參知政事元絳知亳州國子監直講密縣令孫諤集慶軍節度判官葉唐懿各追兩官免勒停特衝替絳坐為其族孫伯虎私禱諤唐懿升補太學內舍生及屬諤於判國子監官處求為小學教諭下御史臺推治而絳復坐辨訴不實諤唐懿坐聽請故有是責絳子耆寧亦坐傳道絳語於諤等御史推問不以實對

罰銅十斤先是絳數請老上曰聞耆寧孝謹好學使校書崇文且留二期慰諭久之耆寧當下獄絳上疏願納平生職祿乞許耆寧即訊於外及絳辭日上召對謂曰朕自知卿一歲即召卿矣面問絳欲易陳許州否絳謝罪不敢擇願得潁州許之賜坐使服學士帶

改潁州乃辛卯日二

月戊辰詔舒亶何正臣同鞠太學獄三月庚午朔命錢藻且權開封八月丙辰許將責六年十二月二十二日孫諤除落銜替舊紀書元絳以子請求罷知亳州

湖北都鈐轄轉運司上捕

搖賊有功使臣列為四等詔轉資減磨勘年有差

乙酉引進使眉州防禦使知衛州李端慤復濮州防禦使端慤坐失舉奪一官至是以戚里特復之仍詔赴闕

上批近喬執中上殿以安南死亡軍士妻子貧餓無所歸乞以死事人於桂州寄下累衣借糧米給之可檢會速與指揮廼詔西京開封府界差赴安南軍士已死而妻未改嫁若孤遺無依者人給米二石具數以聞

執中

先任湖北運判召為司農丞是年二月十六日權發遣提點府界三年四月二日改京西北憲新舊紀並書詔安南軍死事孤寡無依者康給之朱本籤貼云下有詔合刪去執中云云

詔殿前步軍司

見在營兵各置都教頭指教弩手五指揮弓手十指揮
槍刀標排手五指揮各選一人武藝高彊者奏差逐司
各舉散直二人為指使罷巡教使臣

志有

內侍押班石

得一言案試京西第五將軍馬弓箭手馬步射不應格
詔下本將陳宗等具析宗等引罪上批朝廷比以四方
邊備不飭為可虞選置將臣分總禁旅俾時訓練以待
非常至於部勒規模悉經朕慮前後教告已極周詳使
宗等稍異水石亦宜略知人意今尸祿慢令既頑且慵

苟遂矜寬寔難勵衆可並勒停劄示諸將

據樞密時政記上批在五

月二十七日今依實錄附此
本志係此于元豐六年誤也

丙戌贈文思使內侍押班張恭禮為邠州觀察使恭禮
事上藩邸歲久故也 知審刑院安燾言比年詳議官

以文案繁多責重賞輕除者多不願就乞以二年為一

任任滿減磨勘二年自刑部差者已及成資先依刑部
任滿法推恩未成資者補及成資推恩後別理一任從

之 八月二十二
日丁巳可考

詔備軍卒以二千人為額

戊子以右諫議大夫權御史中丞直學士院判司農寺
蔡確參知政事宰相吳充議變法確爭曰曹參與蕭何
有隙至參相漢一遵何約束且法陛下所建立一人協
相而成之一人挾怨而壞之民何所措手足乎充屢屈

法遂不變

此據舊錄
確本傳

右正言知制誥知諫院李定為

右諫議大夫權御史中丞兼判司農寺 右正言知制

誥知審官東院張璪兼知諫院判國子監 三司言糧

綱少欠折會請受聽借兩月行之歲久減免深刑便於

綱運近為錢綱少欠於法未有明文乞依糧綱折會法
今再相度既借兩月請受慮贍養不足別致欺弊欲改
兩月為四月各半分折填從之

己丑前權建康軍節度推官王覺前知澧州西京作坊
使李山甫訴推勘官何琬胡宗回酷虐乞改差官鞠治
詔覺送潤州制勘院山甫令湖南轉運司選官重鞠如
不移前鞠覺山甫各不用併計著為法及再劾覺山甫
所坐如初 詔權御史中丞李定同根治太學獄 右

正言知制誥李清臣言陛下宣明道德制作法度天下
方裒然興于學臣以謂及斯之時宜詔諸路有能明詁
訓小學正樂鍾律及大厯算數者以名聞陛下召而試
之或該通精密不悖於理之正則秩之一命必有異聞
博見者出於其間而士有勸慕樂習於此者矣又言本
朝官制踵襲前代陳迹不究其實與經舛戾與古不合
官與職不相準差遺與官職又不相準其階勲爵食邑
實封章服品秩俸給班位各為輕重後先皆不相準乞

詔有司講求本末漸加釐正以成一代之法

朱本簽貼云不行合

刪去

辛卯翰林學士孫洙暴得風緩不能朝中使太醫問疾相屬元絳罷上意欲用洙遣中使視之知其疾不可為乃用蔡確及卒對輔臣歎惜之常賻外賜錢五十萬

壬辰詔都水監主簿陳祐甫罷相度河事止令逐路監司同相度以聞都水監勾當公事孔平仲歲滿減罷更不補人 禮院言奉詔濮安懿王三夫人並稱曰王夫

人案唐大中三年追尊順宗憲宗謚號禮官請別造神主及改題議者以栗主升祔之後在禮無改造之文亦無重加尊謚改題主之例以臣等所識當以新謚典冊告於陵廟正得其宜神主不改造不重題為得禮中書言改造改題並無所據酌情順理題則為宜況今士族之家通行此例望就神主改題則為通允勅旨宜依又案乾德二年改謚明憲皇后曰昭憲皇后特命宗正卿趙洙改題神主大中祥符六年改上元德皇太后徽名

曰元德皇后升祔太宗皇帝廟室亦命左司諫知制誥
路振改題神主今參詳三夫人神主欲依故事改題於
禮意為允及司天監選用元豐六年癸亥歲四仲月內
擇日遷祔吉從之遣寶文閣學士陳薦改題神主 三
司請於潭州瀏陽縣永興銀場置酒稅選官監臨從之
歲入隸提點鑄錢司市銀封椿 真定府路安撫司言
北人侵耕解子平地詔安撫司遣人候望巡察毋致更
有侵耕如北界以兵護耕種候北人回悉蹂踐之 賜

明州及定海縣高麗貢使館名曰樂賓亭名曰航濟

癸巳提舉市易司言前市易務監官劉佐負市易錢十八萬緡乞籍本家日入屋租償官限二年輸納不足物產沒官又不足責保人代輸自今負市易錢違限有物產者倣此自籍家產日與免息罰從之 知秦州龍圖

閣直學士吏部郎中集賢殿修撰劉庠降為禮部郎中

知虢州坐失舉也

舊紀書庠以失舉降知虢州新紀不書

甲午中書言近制檢正官四員除戶房二員如舊外孔

目房吏房禮房共一員內禮房文字比之他房文字為多乞令戶房檢正官通管禮房從之 詔通判司農寺

周直孺同講究麴法利害從三司請也

八月十一日

乙未上批內外簡閱諸軍已悉用闊閃促張弓減指箭其令在京及諸路作院造弓罷長弣舊制又詔以弓箭樣降付開封府界京東西諸將後又詔轉補諸軍用黃樺闊閃弓馬黃弩上四軍弓八斗弩二石七斗中下軍弓七斗弩二石四斗及詔諸班換前班前班簡行門及

引試武學生用促張弓減指箭射兩石以上者減一斗
詔進士諸科新及第人免試刑法 永興軍等路提
點刑獄主客郎中王孝先熙河副都總管客省使達州
刺史王君萬各降一官君萬改鳳翔府鈐轄西上閤門
使榮州刺史知淮陽軍高遵裕展三期叙遵裕先知熙
州與君萬嘗借請結糴邊儲錢違法回易轉運判官孫
廌案治之君萬乃教蕃官摩丹當博訟廌嘗加箠掠遵
裕以聞欲以中廌命孝先推劾而孝先觀望不盡力再

遣提舉茶場李稷鞫得實故皆抵罪

考先初受命乃元年正月丁卯君萬

自鳳翔鈴轄除熙河監收給散馬種在七月二十一日丁亥六年六月四日始除君萬所負馬

丙申詔諸路有強劫盜人數稍衆許於聽候差使及得
替待闕官內選武勇使臣捕逐給驛券從大名府文彥
博請也 詔廣濟河都大催遣輦運官與本路通判以
上序官在提點刑獄下

六月戊戌朔詔開封府界京東西將下軍馬委將副依
在京提舉司法試騎射等第 樞密院言去月庚寅北

界人馬犯雄州界射傷官兵欲令雄州諭歸信容城縣如北人再至拒馬河南且令婉順約攔即深入近南地分恐彼先以懦兵誘致鬪爭伏精銳於林間候官軍逐利驟出圍掩當常遠斥堠度形勢捍禦毋得遠追自取理曲仍選精強人馬以備應接從之

庚子命權御史臺推直官盛南仲權檢正中書刑房公事王修同催促結絕在京繫囚 宰臣吳充以從子安國贓污抵法奉表待罪詔趣充視事

吳安國贓罪當考

詔太

常少卿知袁州吳評職方郎中知南康軍聞人安道並
與宮觀差遣御史舒亶言評等嘗除宮觀差遣不應復
為郡也 賜兩浙路度僧牒百五十修高麗使亭館

辛丑賜導洛通汴司築隄役兵特支錢 提舉三門白

波輦運司言河陰密務上京埽瓦乞罷差中官督促從
之

壬寅都水監言去月乙未澶州明公埽墊詔明公埽最
為河流向著其南纔隔大隄一重備之不時則與靈平

之患無異本埽見闕正官外都水監丞司可速奏舉差
出埽兵亦即追還以防夏秋漲水

甲辰廣西提點刑獄劉宗傑言知邕州劉初申監凍州
奉職黃案高等下頭首斬知宮闕峒儂智春并執妻子

乞加優賞上批可下曾布速具有功人姓名比優例取

旨智春先為內殿崇班與知武峒麻順福合謀攻順州

兵敗復趨交趾求援至是平之

新舊紀並書廣西捕
斬寇順州蠻智春

權知邕州莊宅副使兼閣門通事舍人劉初權通判州

事觀察推官陳中並追兩官中仍勒停監押西頭供奉
官高懷亮都監內殿承制戴恩並除名權簽書判官侯
偁錄事參軍翟瑜監倉貴州推官吳瑾三班借職張贊
攝司戶齊國鎮司理梁景初各追一官免勒停並坐邕
州火焚官舍千三百四十六區諸軍裹衣萬餘分穀帛
車器等百五十萬故特責之

乙巳廣南西路經畧司言土兵額闕乞許湖南路團結
教閱諸軍投換本路雄畧澄海指揮上批近曾布乞募

諸路差來屯駐兵級內願投換就糧見闕諸軍庶免往來紛紛道路勞費可速相度指揮遂詔除團結諸軍不許投換餘如布請

丙午大理評事崇文院校書同知禮院元耆寧許侍養崇文院校書初無補外者上以絳故特聽耆寧以禮院易監中嶽廟既而御史何正臣有言復罷之太常博

士權發遣荆湖北路提舉常平等事周諶通判蘄州諶與夔州路轉運判官徐師旦皆為御史何正臣論奏且

謂推行法度督責吏屬非謚所長故罷之 詔捧日龍
衛銚直左射指揮均撥入捧日龍衛諸指揮更不補人
其四指揮請受錢帛等委羣牧司糧草委提點倉場司
封樁 權發遣三司使李承之等言文武官諸司人請
受及外縣諸軍衣賜賞給先經專勾司直批勘於糧料
院今欲並令先赴糧料院批勘次送專勾司勾磨從之
合馬步軍兩院為一置兩專勾司分勾百官諸軍請
受

戊申命參知政事蔡確參定編修傳法院法寶錄 閣
門祇候知雄州歸信容城縣李澤遷一官仍賜絹五十
匹時北界巡馬犯邊澤與格鬪重傷故也上批府州牧
羊峰代州海回寨成德軍解子平侵地火山軍闌遺馬
廣信軍拘留百姓趙消雄州巡馬相殺傷涿州修城料
夫北界辦理此七事未絕慮因常使或專遣人來事之
始未及所以應之之辭亦宜豫為經慮一宗文字可專
委檢詳官范育主領編錄

七事
當考

上批京師差馬軍教

頭於開封府界京東西將下既無本營部轄間亦有不
循軍法者兼已致功教成精兵因循置之非宜寬縱銜
勒使時獲罪亦可惜宜悉追還本營於開封府界京東
西二十六將下各選差少壯輕捷性格可教兵級八人
押赴提舉教習馬軍所教成送樞密承旨司引見訖發
遣 又詔排手步人雖已頒教法亦必不能推行指教
可亦令如選馬軍教頭法每將五人赴步軍司委燕達
教習如馬軍法

二十八日步
軍司奏可考

遣大理少卿蹇周輔往

徐州鞠妖人郭進獄

己酉太子中舍權夔州路轉運判官程之元知嘉州之元以父老自陳也

壬子濮州防禦使李端慤提舉醴泉觀端慤兄端愿嘉祐間嘗乞立皇子人無知者端慤因進對袖其舊章以聞上歎曰近世懿戚也

癸丑光祿寺丞陸佃為集賢校理西京左藏庫使內侍押班石得一勾當皇城司皆上批命之且稱佃資性明

敏學術瞻博也得一罷提舉中太一宮集禧觀事先是入內副都知蘇利涉勾當皇城司循故事邏者報事不皆以聞及得一代利涉事無巨細一皆奏御且購以賞

民間往往以飛語受禍云

此據蘇利涉舊傳

詔五路帥臣副

總管管軍臣僚各舉堪將領大使臣二員

兩紀並書

詔謀

殺人案舉自首雖減等坐之其情理凶惡不可留本處者依編勅配隸他所時法官斷謀殺人自首獄從減等論而不用配法堂後官周清以謂昨朝廷議謀殺人得

首所因之法編勅明言指定謀殺人傷與不傷罪不至死奏裁決配又云今所因之謀得用舊律而原免已傷之情復以後勅而奏決以此二說證之則用配法無疑乞申明行下故也

甲寅董戩貢奉大首領經沁伊達木凌節等辭上召逼殿陛諭曰歸告董戩所遣貢奉人甚恭恪今已許汝納穀此後可數遣人來任便交易又聞部落子欲侵汝疆境祖父土田宜善守勿失皆奉詔唯唯因奏本土永寧寨

賜紫蕃僧實寧巴李錫新等已授紫衣願賜師號及來
遠寨蕃官吳恩乞授本族巡檢上令諭押伴官具奏以
聞皆從其請 京東路轉運判官屯田員外郎劉定權
發遣河北西路提點刑獄代太常博士集賢校理丁執
禮歸館供職以執禮乞歸便親養也 上批馬軍都虞
候權管勾馬步軍司燕達自蒞職以來能體朝廷訓齊
士伍之意推原奉承躬親其事不憚勤苦無所顧忌凡
詔法之下間有闕疑建議發明頗多中理故二司所總

師徒技能日以加進不有旌獎何以勸功宜與一子閭

門祇候 提舉導洛通汴司言清汴成四月甲子起役

六月戊申畢工凡四十五日自任村沙谷至河陰瓦亭

子並汜水關北通黃河接運河長五十一里河兩岸為

隄總長一百三里河所占官私地二十九頃已引洛水

入新口斗門通流入汴候水調勻可塞汴口乞徙汴口

官吏河清指揮於新開洛口從之

舊紀於此乃書詔大河注汴壞隄覆舟人

多溺死初導洛通汴新紀於三月庚申即書之紹聖三年正月十七日可考三月庚寅二十一日載清汴始末

甚詳

乙卯上批高麗恐今歲九月間遣使入貢可豫選引伴
官二員令於明州少待其至廼命內殿崇班閤門祇候
宋球假通事舍人左班殿直閤門看班祇候焦顏叔假
內殿崇班詔貢使是王子即以衢州通判胡援代顏叔
引伴并差入內省使臣一員管勾諸司 權管勾馬步
軍司燕達言內外就糧退軍二十一指揮總八千餘人
以禁軍小疾故揀退及武藝淺軟人配填既不訓練又

免屯戍安居冗食耗蠹軍儲欲自今更不增補以漸銷
減候有關依禁軍選募教習武藝不數年間八千退軍
盡可易為銳士內有七百料錢者減為五百依五百料
錢軍等尺招簡從之仍詔上四軍退軍改作五百料錢
軍額 廊延路經畧使呂惠卿乞立定緣邊逐路歲計
糴買糧草數詔遣檢正中書禮房公事王震往陝西轉
運司依惠卿請并涇原環慶秦鳳熙河路取索會計實
數同經畧轉運司連書以聞

十月二十二日
震云云

丙辰錄黔州義軍都指揮使向仲化為三班借職同管
勾義軍弩手從夔州路轉運請也 鼎州言都監向世
溫自陳歸明及三考乞再任上批江南諸向首出歸明
最為忠順可依所乞

戊午詔諸司承受朝廷批狀有合付案不行者於月奏
狀具所礙條貫及如何難議施行

己未命著作佐郎三司勾當公事郭茂恂權羣牧判官
以上批羣牧判官龐元英照對大理獄事未得釐務而

使副日在樞府何暇躬親職事可差茂恂權領故也

詔應導洛通汴事令宋用臣管勾一年如洛水通快委
范子淵閉黃水口其汭汴淤田既非濁水可並閉塞併
水東下接應江淮漕運 賜樞密直學士工部郎中錢
藻樞密副都承旨四方館使舒州團練使張誠一銀絹
各五十以編修高麗入貢儀式成故也

辛酉詔贈鎮寧軍節度使同平章事魏國公崇懿濮安
懿王元子可追封舒王 屯田員外郎權京西轉運副

使李南公管勾崇福宮以御史黃顏言南公女皆適士人而同產女弟在室者已三十餘歲委寄於妹壻范遷家案之有實故也 左諫議大夫安燾等上諸司敕式上諭燾等曰設於此而逆彼之至曰格設於此而使彼效之曰式禁其未然之謂令治其已然之謂敕修書者要當知此有典有則貽厥子孫今之格式令勅即典則也若其書完具政府總之有司守之斯無事矣又閱講筵式至開講申中書上曰此非政事何豫中書可刊之

七年三月六日敕式成
本志云云或增入此

雄州言北界巡馬過拒馬河

南歸信容城縣尉右侍禁宋彥圖禦敵有勞詔減磨勘
三年

癸亥廣南西路經畧使曾布言欽廉州宜各勅驛安泊
交人就驛置博易場委州監押沿海巡檢兼管勾從之

詔開封府界河東陝西義勇保甲上番減巡檢兵級
先封椿添支口食候見銷減人數據闕以請受衣糧等
封椿 詔審刑院刑部遇科場及試刑法流內銓三班

院人並於試前半月選官申中書審刑法三人刑部七人候差試官畢據關差權正官到限一月了絕已分文字過限不支添給以刑法官多差考試而候差權官稽滯案牘從逐司請也

甲子改權發遣淮南東路提點刑獄金部員外郎范百禄權知唐州百禄與知揚州于旼避親也 步軍司奏准樞密院劄子奉旨諸將下牌手步人每將選躋提五人赴步軍司委燕達依教習馬軍所已降指揮教習候

精熟送承旨司取旨今有擘截舍屋差人員等事御批

可比附馬軍兵級已降指揮例速與處分

御集一百十七卷選五人

赴教在此月十三日或并此入披

乙丑詳定禮文并詳定朝會儀注所言檢討官御史臺

主簿何洵直坐前任原州判官失入死罪衝替乞留檢

討從之仍不許理任中書言刑房奏斷公案分在京

京東西陝西河北五房逐房用例輕重不一乞以在京

刑房文字分入諸房選差錄事以下四人專檢詳斷例

從之 大理寺言大理評事元大成坐前知江陵府長
林縣受賕當追兩官詔除名荆湖北路提點刑獄金部
郎中蘇涓轉運判官太子中舍馬瑊嘗薦大成各奪一
官 廢瀘州白芳寨